



**Sud Bosne i Hercegovine**  
**Суд Босне и Херцеговине**

---

Broj: S1 3 IŽ 048498 24 IŽ  
Sarajevo, 02.07.2024.godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović kao predsjednika vijeća, Mirsade Džindo i Redžiba Begića, kao članova vijeća, odlučujući o žalbi političke stranke Naša stranka, izjavljenoj protiv Odluke Centralne izborne komisije Bosne i Hercegovine broj: 05-1-07-5-679/24 od 25.06.2024. godine, o utvrđivanju odgovornosti za vođenje preuranjene izborne, u nejavnoj sjednici, održanoj dana 02.07.2024. godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu utvrđena je odgovornost političke stranke Naša Stranka iz razloga što je putem društvene mreže Facebook na Facebook stranici „Naša Stranka Tešanj“ vodila izbornu kampanju u periodu preuranjene izborne kampanje, pa joj je na osnovu člana 6.7 stav 2. tačka 1. Izbornog zakona BiH i primjenom odredbe člana 19.9 stav 1. tačka 3. i stav 2. Izbornog zakona BiH izrečena novčana kazna u iznosu od 3.000,00 KM. Istom odlukom je naloženo političkoj stranci Naša Stranka, da sa društvene mreže Facebook ukloni spornu objavu za koje je CIK BiH izrekla novčanu kaznu, i da pristalica Nermin Deljić ukloni spornu objavu, te da sve pristalice i kandidate ove političke stranke za predstojeće Lokalne izbore 2024. godine, obavijesti da su dužni da se suzdrže od javnog oglašavanja i vođenja izborne kampanje u elektronskim, online i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Protiv navedene odluke žalbu je izjavila politička stranka Naša Stranka iz svih Zakonom predviđenih razloga, te je predložila da se pobijana odluka ukine i predmet vrati na ponovni postupak, i odlučivanje prvostepenom organu, ili da se ista prinači tako što će se postupak koji se vodi pretotiv žalitelja obustaviti.

U obrazloženju žalbe ističe da predmetnu odluku pobija u cijelosti. Navodi, da je CIK BiH povrijedila procesne odredbe propisane odredbama izbornog zakona BiH. Nadalje, citira odredbe člana 6.2 i 6.3 Izbornog zakona BiH i navodi da je emailom,

koji se obrazloženjem osporene odluke pogrešno tretira kao informacija, podnesen prigovor u smislu odredbe člana 6.3 Izbornog zakona BiH. Nadalje, navodi da je odredbom člana 6.2 stav (1) Izbornog zakona BiH predviđeno da birač i politički subjekt može komisiji uložiti prigovor najkasnije u roku od 72 sata od učinjene povrede, međutim da je navedeni prigovor podnesen 07.06.2024. godine što je 17 dana nakon navodno učinjene povrede, kao i da je podnesen od strane neovlaštenog lica. Nadalje, navodi da je email od 07.06.2024. godine, kako u odnosu na njegov sadržaj, tako i u odnosu na njegove priloge bio jedini akt po kojem je Centralna izborna komisija BiH postupala kada je donijela odluku. Posebno ističe, da dispozitivom odluke politička stranka „Naša stranka“ nije oglašena odgovornom zbog izvršenja gore označene radnje. Navodi da je politička stranka Naša stranka oglašena odgovornom za radnju u odnosu na čije učinjenje se nije izjašnjavala u toku postupka koji je vođen, čime joj je onemogućeno da se izjasni o elementima odgovornosti koje su joj stavljene na teret i za koje je u konačnici oglašena odgovornom. Navodi da CIK BiH nije ustanovila da se korištenjem imena vijećnika, korištenjem loga stranke i postavljanjem video sadržaja na bilo koji način vrši preuranjena kampanja. Na kraju, ističe da se CIK BiH u vezi sa emailom od 07.06.2024. godine nije izjašnjavala na okolnosti tekstualnog sadržaja, niti je u odnosu na navode iz tekstualnog sadržaja vođen postupak. Od Suda BiH traži da prvostepenu odluku ukine i predmet vrati na ponovni postupak i odlučivanje ili da odluku preinači tako što će postupak koji se vodi protiv političke stranke Naša stranka obustaviti.

U odgovoru na žalbu Centralna izborna komisija Bosne i Hercegovine (u daljem tekstu CIK BiH) je predložila da se žalba odbije kao neosnovana.

Žalba nije osnovana.

Iz stanja spisa proizlazi da je Centralna izborna komisija Bosne i Hercegovine je na 36. sjednici dana 25.06.2024. godine, postupajući po službenoj dužnosti u predmetu kršenja odredbe člana 7.1 Izbornog zakona BiH od strane političke stranke Naša stranka, donijela pobijanu Odluku broj: 05-1-07-5-679/24 od 25.06.2024. godine.

Odluka je donešena nakon što je CIK BiH je dana 07.06.2024. godine putem emaila [gradianinzaposteneizbore@gmail.com](mailto:gradianinzaposteneizbore@gmail.com) zaprimila informaciju sa dokazima (screen ekrana) koja se odnosi na kršenje odredbe člana 7.1 Izbornog zakona Bosne i Hercegovine ("Službeni glasnik BiH", br. 23/01. 7/02. 9/02. 20/02. 25/02. 4/04, 20/04. 25/05, 52/05. 65/05. 77/05, 11/06. 24/06. 32/07. 33/08. 37/08, 32/10, 18/13. 7/14. 31/16. 41/20. 3 8/22. 51/22. 67/22 i 24/24) od strane političke stranke Naša stranka. U informaciji se navodi da je na Facebook stranici „Naša stranka Tešanj“, dana 21.05.2024. godine, iako nije parlamentarna stranka u OV Tešanj koristila ime vjećnika Nermina Deljičića koristeći i na video uradcima, a i tekstualno, logo „Naša stranka“ i na taj način vršila preuranjenu izbornu kampanju.

Centralna izborna komisija Bosne i Hercegovine je imajući u vidu odredbu člana 6.2 stav (1) Izbornog zakona Bosne i Hercegovine, u postupku ispitivanja formalno pravne strane podneska utvrdila da je isti dopušten, ali da je podnesen od neovlaštenog lica iz kojih razloga je u smislu člana 6.2 stav (2) i (3) Izbornog zakona Bosne i Hercegovine predmetnu informaciju cijenila kao inicijativu za pokretanje postupka i postupak vodila po službenoj dužnosti.

Postupajući po navedenoj inicijativi, Centralna izborna komisija Bosne i Hercegovine je nakon prijema, u skladu sa zakonskom procedurom, aktom broj: 05-1-07-833-3/24 od 11.06.2024. godine inicijativu dostavila političkoj stranci Naša stranka na izjašnjenje. u roku od 24 sata od prijema akta.

Na navedenu inicijativu, izjasnila se politička stranka Naša stranka i dostavila izjašnjenje u kojem navodi da je prigovor podnesen od strane anonimnog fizičkog lica, te da je isti neblagovremen, jer je podnesen 07.06.2024. godine. Navodi, da nije moguće zaključiti da li lice koje podnosi prigovor ima ovlaštenje za preduzimanje takve radnje, pa se isti treba odbaciti. Nadalje, navodi se da ova politička stranka ni na koji način nije vršila preuranjenu izbornu kampanju. Ističe, odredbu člana 1.1a stav (1) tačka 8). tačku 7). te odredbu člana 7.1 Izbornog zakona BiH. S tim u vezi, navodi da lokalni odbor Naše stranke Tešanj, a imajući u vidu odredbe Izbornog zakona BiH, nije prekršio odredbe člana 7.1 niti odredbe člana 9. Izbornog zakona BiH, jer spornom objavom nije upoznao birače i javnost sa svojim programom i kandidatima za predstojeće izbore, niti je sponzorisao objavu koju su podijelili na svojoj društvenoj mreži Facebook. Ističu da vijećnik Nermin Deljkić koji je ujedno i član Naše stranke od 12.03.2022. godine je podijelio video o svom radu u Općinskom vijeću Općine Tešanj, te u prilogu dostavljaju dokaz o članstvu Nermina Deljkića u Našoj stranci.

Pravilan je zaključak CIK BiH da je došlo do kršenja odredbe člana 7.1. Izbornog Zakona, jer iz dokaza koji se nalaze u spisu jasno proizilazi da je uvidom u kompletan spis predmeta i dostavljeni snimak objave sa društvene mreže Facebook. Centralna izborna komisija BiH je utvrdila da je politička stranka Naša stranka odgovorna za kršenje člana 7.1 Izbornog zakona BiH, jer je na Facebook stranici "Naša stranka Tešanj" dana 21.05.2024. godine, vodila izbornu kampanju u periodu preuranjene izborne kampanje na način da je objavila koji su prioriteti ove političke stranke i na čemu će inzistirati, te u istoj objavi podijelila objavu vijećnika Nermina Deljkića gotovo istog sadržaja, a na kojoj je jasno istaknut logo političke stranke Naše stranke.

Odredbom člana 7.1 Izbornog zakona BiH propisano je da je u periodu preuranjene izborne kampanje zabranjeno vođenje izborne kampanje u elektronskim, onlajn i štampanim medijima i putem društvenih mreža ili bilo koji oblik javnog oglašavanja

kampanje. Ova zabrana ne odnosi se na organizovanje zakonitih zvaničnih skupova organa i događaja političkih subjekata u svrhe koje nisu kampanja.

U članu 1.1a stav (1) tačka 8) Izbornog zakona Bosne i Hercegovine propisano je da je „Preuranjena kampanja“ svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 9. stav (1) Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH“, broj 31/24) propisano je da u periodu preuranjene kampanje političkim subjektima je zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom (2) istog člana propisano je da se zabrana iz stava (1) ovog člana, odnosi na upoznavanje birača i javnosti sa programom i kandidatima političkih subjekata za predstojeće izbore.

Suprotno navodima podnosioca žalbe govori činjenica da je Nermin Deljković, koji je pristalica političke stranke Naša stranka na društvenoj mreži Facebook, koja je jedna od najpopularnijih internetskih mreža na svijetu, objavio sporni tekst „CIPS-ova potvrda o prebivalištu-ima da je NEMA!“ i na istoj istaknuo logo Naše stranke, a da je navedenu objavu podijelila Naša stranka Tešanj i istakla tekst „Ukidanje CIPS potvrde je nulti prioritet. Naša stranka Tešanj će insistirati na tome...“ Čime je jasno ukazala na viziju političke stranke i da objava Nermina Deljkovića ne ukazuje na njegovu ličnu viziju nego na viziju političke stranke kojoj imenovani pripada. Takođe, imajući u vidu citirane zakonske odredbe kao i sam tekst iz navedenih objava: „Ukidanje CIPS potvrde je nulti prioritet. Naša stranka Tešanj će insistirati na tome...“ i „CIPS-ova potvrda o prebivalištu-ima da je NEMA!“, a posebno činjenicu da je istaknut logo političke stranke Naša stranka, jasno proizilazi nesporna činjenica da objave u svom opisu i sadržaju pokazuju promociju programa ove političke stranke za predstojeće Lokalne izbore 2024. godine, koje su imale za cilj upoznavanje javnosti i birača sa programom navedene političke stranke.

Sam podnositelj žalbe ne osporava da je objavljena sporna objava kako od strane političke stranke na Facebook stranici „Naša stranka Tešanj“, tako i na Facebook profilu Nermina Deljkovića, pristalice ove političke stranke.

Neosnovani su navodi kojima žalitelj ukazuje na povrede procesnih odredbi izbornog Zakona, Naime, odredbom člana 6.2 stav (2) Izbornog zakona BiH je propisano da će izborne komisije, po saznanju za učinjenju povredu iz svoje nadležnosti, pokrenuti postupak po službenoj dužnosti protiv političkog subjekta i zaposlenog ili na drugi način angažiranog u izbornoj administraciji zbog kršenja odredbi ovog Zakona, dok je stavom (3) propisano da inicijativu za pokretanje postupka u smislu stava (2) ovog člana može podnijeti pravno ili fizičko lice nadležnoj izbornoj komisiji u pisanoj formi,

u kojoj je obavezno navesti mjesto, vrijeme, sadržaj učinjenje povrede i počinioca. U konkretnom slučaju, inicijativu za pokretanje postupka po službenoj družnosti u pisanoj formi podnijelo je anonimno fizičko lice i u svojoj prijavi dostavlja informacije i o mjestu (društvena mreža Facebook) vremenu (vidljiv je datum 21.05.2024. godine), kao i o sadržaju učinjene povrede i počiniocu (vođenje preuranjene izborne kampanje od strane političke stranke Naša stranka i vijećnika Nermina Deljkića).

Isto tako, neosnovani i ničim dokazni su navodi, da je politička stranka Naša stranku oglašena odgovornom za radnju u odnosu na čije učinjenje se nije izjašnjavala u toku postupka koji je vođen, čime joj je onemogućeno da se izjasni o elementima odgovornosti koje su joj stavljene na teret i za koje je u konačnici oglašena odgovornom", jer iz stanja spisa proizilazi da je Centralna izborna komisija BiH aktom broj: 05-1-07-833-3/24 od 11.06.2024. godine inicijativu (anonimnu prijavu i dokaze dostavljene u prilogu) dostavila političkoj stranci Naša stranka na izjašnjenje, u roku od 24 sata od prijema akta, a na traženo, putem cmail-a [nasastranka@nasastranka.ba](mailto:nasastranka@nasastranka.ba) zaprimila Izjašnjenje političke stranke Naša stranka br. 113/24 od 12.06.2024. godine i isto cijenila prilikom donošenja pobijane odluke

Neosnovani su i navodi podnositelja žalbe da je email od 07.06.2024. godine, kako u odnosa na njegov sadržaj tako i ti odnosa na njegove priloge bio jedini u akt po kojem je CIK BiH postupala kada je donijela odluku iz razloga što je Centralna izborna komisija BiH pobijanu Odluku donijela uvidom u kompletan spis predmeta i sve raspoložive dokaze. Naime, u dokaznom postupku je utvrđeno da je politička stranka Naša stranka na Facebook stranici Naša stranka Tešanj podijelila objavu Nermina Deljkića i istaknula tekst., Ukidanje CIPS potvrde je nulti prioritet. Naša stranka Tešanj će insistirati na tome, kao i da je na profilu vijećnika Nermina Deljkića objavljen tekst „CIPS-ova potvrda o prebivalištu-ima daje NEMA!" i jasno istaknut logo političke stranke Naša stranka, zbog čega je utvrđena nesporna Činjenica da objave u svom opisu i sadržaju pokazuju promociju programa ove političke stranke za predstojeće Lokalne izbore 2024. godine, koje su imale za cilj upoznavanje javnosti i birača sa programom navedene političke stranke.

Da se radi o pristalici političke stranke Naša stranka potvrđuje i sam podnositelj žalbe u žalbi jer je u dostavljenom izjašnjenju naveo daje Nermin Deljkić Član Naše stranke od 12.03.2022 godine i u prilog tome dostavio dokaz o članstvu Nermin Deljkić u Našoj stranci.

Isto tako, iz sporne objave koja sadrži i logo stranke Naša stranka, proizilazi daje Nermin Deljkić. pristalica Naše stranke, postupao suprotno odredbama člana 7.1 Izbornog zakona BiH. za stoje odgovorna politička stranka Naša stranka. Čiji je on pristalica, u skladu sa odredbom člana 19.9 stav (2) Izbornog zakona BiH.

Takođe valja istaći da je od strane CIK-a BiH pravilno utvrđeno da je politička

stranka Naša stranka u smislu člana 19.9 stav (1) tačka 3) odgovorna za kršenje odredbe člana 7.1 Izbornog zakona BiH jer je vodila preuranjenu izbornu kampanju putem društvene mreže Facebook na stranici Naša stranka Tešanj, ali je i u smislu člana 19.9 stav (2) Izbornog zakona BiH odgovorna za postupke koje učini njena pristalica, jer kao takvi i predstavljaju političku stranku Naša stranka. Naime, poruka Nermina Deljkica na društvenoj mreži Facebook u svom sadržaju i opisu, koja u prilogu ima i jasno istaknut logo političke stranke Naša stranka, se upravo cijeni kao promocija političke stranke.

Iz navedenih razloga pravilno je postupila Centralna izborna komisija BiH kada je izrekla novčanu kaznu u iznosu određenom dispozitivom pobijane odluke cijeneći da će na taj način utjecati da se navedena politička stranka kao i njene pristalice u budućnosti uzdrže od kršenja odredbe člana 7.1 Izbornog zakona BiH kao i ostalih odredbi Izbornog zakona BiH a sve u cilju daljeg sprječavanja kršenja odredbi Izbornog zakona BiH i zaštite izbornog procesa.

Stoga je prema shvatanju vijeća Apelacionog odijeljenja Suda BiH pobijana odluka CIK BiH pravilna i zakonita, jer se radi o nedozvoljenoj radnji u smislu člana 19.9 stav 1. tačka 3. i stav 2. Izbornog zakona BiH, jer se radi o promociji političke stranke prije zvanične izborne kampanje

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA  
S U D I J A  
Zvezdana Antonović